

# Nuorttanaste

„Mutto go si oidne naste, de sadde si illoi.“

„Son (Jesus) læ dat čuvvgis iddedes guovsonaste.“

Nr. 5.

16. jakkegærdde.

»Nuorttanaste« maksa ovta kruvna jakko-  
dagast, bladde dinggujuvvu juokke poasta-  
rappe bokte.

15. Marts 1914.

»Nuorttanaste« olgusboatta guovte gærde  
manost — dam 15ad ja dam 30ad bæive  
juokke manost.

## Buokai sulli, mutto i Jesus.

Dabe gavnudnu okta bæggalmas ja dovdos olmai, buokak dovddek su; mutto harvak læk oappami dovdat su riehta. Su namma læ sattan.

Su halidus ja mærrer læ: Mailbme helveti. — Amas son boattet oanekažat daina aiggomušaines ja bargoines, adna son buok hutkid. Son ouddanloidasta damditi manga lagaš hame vuolde. Son adna juokkelagaš dilalašvuoda divdna. Son ouddanloidasta daid mangalagaš dilalašvuodaid vuolde. Ja son læ harjanam dam vuoge atte oazžot buok ječas avkken — vanhurskesvuoda hame vuolde.

Son datto læk buokai usteb — mutto læ daddeke buokai vašalaš. Su mattajægjek læk ædnag — ja gavnudjek juokke sajest.

Jos si dustek, de dattok si maidai læk du ustebak. Mutto man sagga si sulastettek satana. Sin čalmik muitotet mudnji gærbmaša. — Dat oaiivvamuš satta maidai ouddanloidastet nuftgo sardneolmai, ja son satta čokkit stuora gulddalægje joavko. Dastgo son læ fuomašam, atte ios du barggo galgga kruvneduvv t likoin, de berre son ainas šaddat su vašalažaides lakai — u't brest go vejol s. Son læ damditi gonagas gonagasai gaskast, bappa bapai gaskast, sardnejotte sardnejotti gaskast. bivdde bivdi gaskast j. n.

v. Ja son matta læt riggis riggasid gaskast ja vaivaš vaivašid gaskast. Son læi dam riggis olbma usteb, go son celki sudnji: „Læge oagjebas, bora ja juga ja læge ilost.“ Dal laži son senga dam riggis olbmai helveti. Ikgo don dast mate oaidnet dam čæppis betolaža. Son læi oalgotam su borramušain ja jukkamušain ja iloin. Ja bæive maŋŋel læi son nuft vaivaš atte son i æigadussam obba čæcce-goaikanasa. Son adnu ovta goaikanasa čæce, mutto i goassege agalašvuodast dato helvetoaiivvamuš udnut sudnji dam. Ige juo riggis olmai rokka-dala sust dam, dastgo su usteb læ dal almostuvvam — ja son læ dušše bærgalak, ja damditi čuorvo son Abrahami oazžom varas dam bagjelgeččujuvvum Lasarusavaekken. Mutto njello læi gaskast. — — —

Judas vuostai gævati son ječas nuftgo mattajegji usteb; mutto dat ænemus maid son mati addet sudnji læi badde čæbet birra.

Sardneolmai gaskast læ son okta angeres lbmel sane sardnedægje; mutto son satta finaset ruoktotdoallat vebaš duottavuodast, ja ouddandivvot ječas dobbe gost Jesus galgaši oazžot saje.

Oskočærdai gaskast læ son maidai sin sullasaš. Ouddandoalla viššalet olgoldas oapo nuftgo dat riehta, ja dubme buokječa oskočærdaid.

Bivdi gaskast i læk oktage čæbbet suoladet gulid go aido son.

Gonagasai ja kæisari son maidai sulastatta, ja manna

alelassi ouddan čævllaivuodain ja gudne angervuodain. Dam duodaštet dak stuora varralavgok. —

Paulus šaddai su miel dolbmuides sulli rabastam varas sin čalmid oaidnem varas ječasek ja bæste.

Satan dakka ječas mailme lakasažžan čalmetuttem varas daid æppeoskolažaid čalmid.

Mutto cælkak don: Okta gutte læ nuft „juokkelagan.“ satta maidai ouddandivvot ječas nuftgo Jesus ješ daggobokte atte son bagielasas valdda čuvvgis engel hame. Dat læ aido dat maid son gæččal, ja son boatta hui gukkas. Mutto Jesus son i sate daddeke sulastattet. Damnego son balla Golgatast, ja damditi son i sate čuorvvot: „Dat læ ollašuvvum!“

Damditi: Satan satta sulastattet buokaid, mutto i Jesus.

M. Furevik.

## Ale hæpanadda adnumest andagassi.

Henrik dat njælljad, gonagas Frankrikast 1589—1610, son gutte šaddai suollemasat-sorbmi juvvut ovta olbmast, læi okti moarest sutadam ovta su buoremus olbmain, general Fredrik Herman von Schomberga. Muttom bæive maŋŋel rakkanegje si soattat (dat læi Jory'est 1590). Monarka, gutte dam aige sisa læi oaidnam su boastovuodast ja nuft i ožžom rafhe, goččui dam generala ouddasis. Dai ječa generalai særvest

sarnui son navt: „Rakis generala, dat dakka mudnji baba, atte mon læm sivatallam du ašetæbmen. Ollo vejolaš dat læ mu maņemuš ællembæivek, mon im sate mannat havddai buorre olbma massujuvvum gudnin mu oamedovdo alde. Mon anom daggobokte vaimolaš andagassi addujume. Boade mu salli, šadda mu usteb ja ale maite šat monno gaskavuoda!“

Dat offišera čuožžoi dievva ibmašin. Dam jesječas vuoledume son i lifče vuorddam dam famolaš gonagasast. Gadnjalak čaluin sogjalatti son ječas vuolas ja gakkadi: „O, olbmačam, maid dagak don? Ja dat læ duotta, don læk gieskad havvadattam mu vaimo ja gudne dastgo i mikkege læk mudnji bakčasebbu go atte æppeguduejattujuvvut daggar alla olbmast. Du buorrevuotta šadda dam bæive rajest makset muduji hæga, dastgo mon im dovda dam bæive rajest stuorab ilo go atte oaffaruššat hæga daggar vanhurskes hærra balyvalusat,“

\*

Man ædnag gerdid ik læk don hæppašattam ja bilkkedam Jesus du suddo ælleminad? Lækgo don rokkadallam sust andagassi ja ožžom dam? Duostakgo don jabmet alma andagassi addujuvvum suddoitaga?

## Vehaš redaktøra giedast. (Biedgos jurddagak).

Vimag aigom monge čagetuttet min rakis blade moddin biedgos jurddagin. Lifčim galgam ouddal juo čallet; mutto uccan læmaš sagje min bladest dam maņeb aiggai, go ædnagak læk čalašam viššalet min bladest daid moaddelagaš ašid birra. Ja gal dat læ suotas oaidnet, go olbmuk alggek sagastallat daid manga lagaš ašid birra, maina duottavuodast læ avkke ja oapatus. — Ja vaiko olbmuk čallek gutteg guimidæsek vuostai, de æp mi damditi galga valddet dam hœjos jurddag, atte si læ sutadam. Iskademe bokte šaddet manga mavsolaš aše čielgasen. — Damditi læp mi

addam blade saje daidi moaddelagaš čallidi duom dam aše dafhost. Ja go mi læp oaidnam, atte min lokkek læk læmaš nuft viššalak čallet bladdai, de læp mi ucceb saje valddam ječamek čallagidi. —

Mi oaidnep maidai damge, atte min bladde læ aibaš ucce, ja guorrasap daid ustebid gudek datošegje dam stuoreduvvut, ja min halidus lifči maidai dat sæmma; mutto dam ragjai læmaš dat vaddes migjidi dam lavke valddet. — Mi guorrasap dam, atte min naššona darbaša sagga stuorab blade, mi vela galgaši davjeb olgusboattet. Dat orru čajetæmen, atte Samek læk ožžom min blade (nuft ucce go dat læ) hui rakesen. Dam čajeta dat, atte dat læ ožžom nuft ædnag doallid dam maņeb aiggai.

Jos redaktøra i fertteši jottet de satašeimek mi dal addet „Nuorttanaste“ davjeb olgus. Mutto redaktørast læ damditi guokte vaddes ja avkalaš bargo maid fertte doaimatet. Gaibbadusak bottek manga guovlust, atte jottet duobbe ja dabe, ja gaibbadusak bottek maidai blade dafhost. Ja nuft gukka go redaktøra fertte guoktoi bargoi doaimatet, de i læk sudnji buorre dæyddet su sajest nuft moft gaibbeduvvu ja galgaši — Redaktøra dovdda darbašvuoda jottet, ja son dovda maidai darbašvuoda barggat daina aidno samegiel bladn, maid min naššona ainas darbaš. Dastgo dat fertte læt hæpaden min naššoni, atte i galga gavdnut dam mađe bladde, atte muitota mailmai, atte gavdnu okta naššona mailmest mi goččuduvvu Sabmen. Ja dat maid redaktøra ja su bargos vuolde haledifči læ Samid duotta vuoiŋalaš ja naššonalaš avke ja buristsivdnadusa. I oktage galga læt dam oaiivvelest, atte redaktøra læ daroduttema vuostai damditi. Gukken erit. Mutto redaktøra læ dam oaiivvelest, atte mi Samek berrep ainas oappat darogiegjela; mutto æp nuft ollo atte mivajaldattet ja erit-suppep min œdnegiellamek (samegiela). Mi oaidnep, atte maidai ječa naššona olbmuk oppek æra amasgielai; muttoæi dak damditi erit-suppe

vanhemgiela. Mutto dan varalašvuoda gavdnap mi min ucca naššonaš duokken. Ædnagak min aiglaš nuorain, æi šat sate œdnegielasek lokkat ja čallet, go olles olmučen læ šaddam. Ædnagak dinggošegje Samegiel blade; mutto de æiges mate lokkat Samgiela, (ja Samek læk). Gal dak juo læ oappam dam rajest obba ollo. Mangas læ ferttim dovdstet, atte si læk oappam sin œdnegielasek lokkat æska Samegiel blade bokte. Ja gal mi dam jakket. —

Jos joge min bladde læ ucce ja muttomid mielast hægjo ja bagjelgæčujuvvum, de læ dat ucca bladaš daddeke min naššona čuovgas ja mutto min »vajaldattujume aige«. Ja vaiko ucce, de dat čuovgga daddeke, čuovgga nuft, atte æra naššonak mailmest oidnek dam ucca nastasa, mi čuovgga Nuorttaædnam bagjel. Damditi læ dat šaddam migjidi nuft vaddes don čuovga časkadet — dam naste čikkat. Damditi berrep mi buok Samek barggat viššalvuodain dam ala, atte bisotet dam aidno blade, oudemusta doallama bokte, burid čallagid bokte, rakistæme ja uccan dubmim ja ucceb bagjelgæččama bokte, de galgga daina mannat burist ja min naššona galgga ješ buristsivdnaduvvut dam bargo vuolde.

Mangas læ dam oaiivvelest, atte go si mattek darogiela lokkat, de si æi darbaš šat samegiela lokkat. Si gavdnek buok darogiel avisain ouddal juo. Ja gal dat nuft læ. Mutto galggapgo mi damditi bagjelgæččat min œdnegiellamek, jos vela mi dam gavdnap nubbe gilli. Dakkekgoson ječa naššonak dam. Gukken erit. Jos don addek darogiela, de i læk celkkum, addejek go ærak du naššonast dam. Buorre læ maidai jurdašet vehaš ærai avke ala. — Læ maidai oidnujuvum dasge, atte dak gæk ænemus læk oappam gielaid, æi bagjelgæča maidege gielaid, vaiko man hægjo læš. Ige oktage mist Samin galga boattet dam boasto jurddag ala, atte mi hæppanadap min naššonastæmek ja gielašæmek. Dat læ alo dat mavsoleinus giella dat, maid olmuš algost oappa, ja dasa galgga olmuš alo adnet vuostas rakisvuoda. Ja son gutte vašota, læ sorbmijægje. Damditi satta olmuš šaddat su naššonast sorbmijægjen ja bætten daihe vuovddem. — Ibmel varjalekus min erit dast!

Ovla Andras.

## Brævak.

### 3 bræva Dænovuonst.

Bivdam saje dam moadde sadnai, maid monge aigom čallet dam min rakis bladdai, ja muittalam atte olbmuk ellek dærvam dabe min guovlust. Dalkek læmäs hui hæjo.

Dal jorggalam mon mu čallagam æra guvllui. Isardneduvvu gostege nuft ollo Ibmel sadne go Bonjakasast, ja jos Ibmel min rokkus i gulaš farga dabe dam avddem baikest, gost æra i gullu go mailmalaš saka. Igullu sagga mikkege sielo birra jerrujuvvumen moft don ain væjak oskot, ja moft ain væjak vagjolet. Dat læ vieka laittases baikke dam dafhost. Dak nuorak mak læk mendo sagga dærvanam dam mailbmai, læk likkotæmek. Jurdaš atte ællet alna Ibmel sanetagal Si æi jurdaš ollo dam boatte bæive ala, mi farga læ boattemen dam ædnam bagjel — namalassi dat stuora duobmebæivve. Ja likkotæmek læk dak sielok, gæk armo aigest æi læk occam Hærra.

Vuoi dadde daid nuorai bagjel, gæk illodet mailmest, si saddek čierrot. Mutto jos gal mi saddap morraš gillat dam mailmest, dat gal læ min avkke.

Ollo lifči čallet must dem rakis bladdai; mutto uccan læ dille. — Mon avčom buok Same ustebid doallat dam rakis »Nuorttanaste,« mi vela boatta dam rakis ædnegielli. Muittaleket maidai oddasid juokke guovlust. —

Allet æra nuorak nuft bargga, atte gost buolleviue diettebetet, de dam alggebetet doarredet ja guoibmadallat dasa dassago njuovča lakta, ja nuft adret olles basse bæive danen. Ja vidne valdda buok muitoi.

Dærvuodak buok Ibmel manaidi gukken ja lakka!

Anna K. Johnsen.

Hr. redaktør!

Saddim monge moadde sane min rakis »nastai,« jos læš sagje mu čallagi.

Dærvasvuodak min guovlust dam have. Ibmeli gitto buok dam armo ja buorrevuoda oudast. — Mi læp fast ællam dam bæive ragjai atte b

saimek oaidnet dam dovdos usteba, gi nuft čabbat mojtalla migjidi — buridi ja bahaidi. Ja dat læi dat hegga čabba bæivaš, mi bagjani ja čajeti su šerris muodost, dam 25ad januar bæsaimek mi dam oaidnet. Gitos lekus Ibmeli, go dassa læ min varjalam! Mutto erinoamaš gitos dam oudast, go læ min nuft burist varjalam dam ragjai buok bahas ja varalašvuodast erit — namalassi dam stuora Hærra Jesusi!

Mi læp ællam dam ragjai hui rafhalažat, æppe diettam æppe gullam dai stuora likkotesvuodaid, mi ječa mailme osid læ dæivvam — nuftgo ouddamærka diti Alaskas j. n. v. Mi galle læmäs, Ibmeli gito, dam ragjai »dego guole čoalest.« Mutto Hærra ješ dietta maggar jage sisa mi dal læp loaidastam, ja maggar bæivek min dastmaŋgel deivek. Gal dat i læk nuft havske gullat dai stuora likkotesvuodaid, mak deivek olmuš rieboi guovddo. —

Mon maidai ješ doalam dam rakis blađe ja nuft bassam oaidnet ječčam čalmiguim mi ain dæpatuvva dam viddes mailmest. Ja gal dam mailmest læ vaivve ja hætte-čurvas. Mutto farga læ dat buok baccam deike min maŋgai.

Manga olmu læ dabe eritfarrim dam vassam jageš, ja Hærra ješ dietta, gosa si læk mannam ja gost si læk rabastam sin čalmidæsek jogo dam agalaš likkotesvutti, mi buola riššain ja dolain, gost dat boradægje mato i jame goassege ige dolla časka. Likkotæbme læ dat olmuš, gutte Ibmel armo bagjelgæčča.

Ællet dærvam dam Israel baiman halddoi.

Ragnhild K. Olsen.

### Raddovuonast

læ læmäs buorre sallebivddo. Dabe læ fidnam ollo olbmuk salledid oastemen — namalassi bagjendæno olbmuk nuftgo Buolbmageš ja Varjageš.

Dalkek læmäs hui hæjo oddajage rajest. Ravvestam vela, atte dingguket viššalet samegiel blađe

J. P.

### Juovllavuona

rokkusvissoi læ sisaboattam čuovvovažat:

Ole P. L. Olsen lisa bokte Kr.	45,15
Petter O. Breivik —»— »	36,25
Ole Olsen Lille —»— »	34,25
Nils E. Olsen —»— »	16,35
Arvid Eskola —»— »	25,60
Iver Iversen —»— »	60,50
Fredrik Brekke —»— »	24,01
Alexander Pedersen —»— »	284,25
Lerpol nissonisærvest — »	221,93

Oktibuok Kr. 748,29

man oudast daggobokte kvitterijuvvu.

Sæmmast aigom mon saddet min vaimolaš gitosa buok addaldagai adididi, ja daidi, gæk læk dorjum min nissonisærvæ. Mi doavvop, atge ædnagak ain dastmaŋgelge vækktet min dam darbašlaš bago vuolde.

Rokkusvieso komite oudast.

Alexander Pedersen,  
kasserer,  
Lerpol O. tertanen.

### Roald Amundsen.

#### Læ doallam 3000 foredrag.

Maddapola-gavdne kaptein Roald Amundsen læi gieskad Paris gavpugest ja doalai sarne (foredrag) su Maddapola-ræisos birra ja čajataddai vela čuovgegovaid. So namati dobbe, atte son dam ragjai læi doallam 3000 foredrag Maddapola-ræiso birra. Dasto læ son fidnamen Ruosaednemest, gost son maidai aiggo doallat foredragaid. Gasko marts mano boatta son sidi Kristianiai ja orosta dast ovta mano. De fast manna Son Franciscosi, Amerikai garvesen orduet Davvepola-ræiso.

Amundsen læ arvvalusast jottat Son Franciscost Davvepoli 15 juli dam jage.

#### Aibmogirdem.

Okta aibmogirdde, gæn namma læ Garia, læ golmain passašerain girddam 3300 meter allagasast, ja læ dam lakai læmäs buok alemusast go oktage æra aibmogirdde dam ragjai læ ollim.

#### Dam stuora Holmenkolbæive

vuostarga 2be marts læi hui čabba gidadalkke bæivaš bati heggoset ja dalkke læi dieđostge buorre. Arvo mielde 50,000 olmu legje dam bæive boattam gavpugest bajas Holmenkolleni gæčat daid čæppes njuikkijegjid saveki alde. Ædnag nuorak njuikku 30 gidda 35 meter njuikketagaid bagjen

alla luoka alde, ja mangas dieđostge ožžo prēmiaid dam oudast. Maidai soames olggoædnamlas læi mielde njuikkemen Holmenkollenest.

#### Ruošædnam radditusast

læ boattam dat arvvalus atte olmuš-lokko galgga dollujuvvut dam 14. decbr. 1915. Dat boatta makset 11, 368,000 rubela

#### Maid soatte vaši Italiai.

Dat læ rekenastujuvvum, atte dat soatte mi dibma læi Italia ja Tripolis gaskast, læ šaddam boattet Italiai bagjel 900 million olgusgollon

#### Troandem kommune

æ bovddim radditusa læt gavpuga guossen 19—21 mai dam jage, go čuođejage-festalašvuodak galggek dollujuvvut.

#### Fast okta skipa forlisen ja gosi buokak skipa olbmuin duššam.

Okta darolaš njelja-stuvlak skipa, mon nainma læ »Tasman,« læ oudeb manost forlisen Nordsjænest. Dat læi boattemen Londonest deike Norgi Drammen gavpugi. Matke alde šaddai orkandakke, mi bosoi skipa bagjel sido ala. 13 olbmu dušše daggo bokte, atte si manne smavva vadnas sisa ja devddujegje. 6 olbmu, gæk bacee dam bælle gobmanam skipi, šadde æska 3 jandura gæčest gagjujuvvut ovta duiskalaš bivddedampast; mutto 2 duiskalaža dušše maid gajombargo vuolde.

#### Maņemus olmuš lokko Kristianiast, 251,000 sistasse 1as februar dam jage.

Olmušlokko læ gieskad dollujuvvum Kristianias. Dat čajeta, atte oaiivegavpugest legje 1as februar dam jage 251,000 sistasse; dibma legje 1as februar 250,526. Nuftgo mi dast oaidnep, de æi læk lassanam æmbo go lagabuidi 500 sistasse 1as februar dibma Kristianiast.

#### Dat engelas raddetus

læ bevilgim 180,000 kruvna engelas olbma Shacktetan Maddapolaekspedišoni. Gal dat olmai juo oažžo vissa nokka ruđa dam su matkasis.

#### Maid ruošalaš soaldatak ferttijik gierddat.

Ruošalaš kæiser ja okta stuoraoivva-

muš iskadæiga gieskad 64 soaldatak gæk legje matkuštam Petersburgast Arkangeli ja fast ruoktot 1100 kilometer saveti alde. Gal dat juo læi obba gukkes soaldatak-marša.

#### Bači ovta nisson revolverin.

Okta 24-jakkasaš barggeolmai bači gieskat Notodden gavpugest rabas mađe alde ovta nieida 4 gærde revolverin, Vuostas ladda dæivai nieida muođo, ja luođda bođi bane vuostai. Golmain maņemus laddain i dæivvam son nieida. Go politia dam biđi diettet, læi son garves bigjat olbma arresti: Vissa læmaš juoga soappamæltomvuotta dam olbma ja nieida gaskast.

#### Suoladam 2000 kruvna.

Sandvikenes lakka Kristiania læ gieskad muttom suollagak ijaaiige gaikkom sisa ovta fabriki ja suoladegje 2000 kruvna. Suollagak æi læk vela gidda-doppitallam

#### 4928 buldokasa

daihe garanas læ baččujuvvum dima jage Daveb Troandem amtast, čalla okta Troandem avisa. 15 evre maksujuvvui prämie geđe buldokasa oudast.

#### Bisma Støylen.

Dat odđa bisma Kristiansanda stiftast galgga 8ad marts ordineijuvvut bisman Bisma Tandberg Kristianiast galgga dam doaimatusa doaimatet Vor Frelser girkost Kristianiast

#### Englanda

aiggo skappot aldsesis 250 girddemašina, mak galggek adnujuvvut soattebalvvalussi.

#### Suomaædnam

læ dal saddim dam maņemus adnomrokkus Ruošædnami friavuoda bisotam varas. Suomaædnam læ dal stuora halo siste — nago de šadda ollaset Ruoša vuollai. I læk imaš go Suomaædnam šuokka ja rokkodalla.

#### Gassa muorra.

Okta baikest Solumest (oarjen) cægga okta aikamuorra, mi milteda 8 meter birra. Dađemielde go dittujuvvu, de galgga dat læt min ædnama stuoramus muorra.

#### Obba tienas.

Dat darolaš amerika linja læ tinem

bælle miljon kruvna dam vuosta jakkebælest. — Goalmad dampa juo darbašuvvu.

#### Maid okta avisa satta tinet.

»Morgenposten« tini mannam jagest 165,000 kr. Gal dat juo læi čabba vuoitto ovta avisast.

#### „Nuorttanaste“ redaktora

læ dal su riegamad baikestes Tanast, go dat nummar čallujuvvu. Son i maca ruoktot oudlal gasko mai mano.

#### Sameædnamest

læmaš dal buorre dalkek moadde vakko; mutto i mikkege bivdoi dam ragjai.

## Diedetusak:

### Same manai sida

#### Korstjorast Altavuonast

læ dal gærggamen ja valddujuvvu adnui juli manost. Dam sidast ožžuk oarbes manak ja vaivaš olbmuid manak buorre divšo ja bajasgæssema juokke lakai — sikke rubmaš ja sielo bælest. Sikke nieidda ja ganddamanak valddujuvvujek. Gæk seje oceek, berrejek diedtet čuovvovažaid: Gandda vai nieidda, dærvas vai lames ja man davdast buocca ja manai age. — Bajasdoallo manaisidast læ frija. Oceek čallusek dallanaga dam blađe redaktora, gutte æmbo bajasčuvgitusa adda dam birra.

Red. Ole Andersen,  
Skjoldhavn.

#### „Nuorttanaste“

kommissjonærak 1914 læk:

Nils Svendsen, Veines,  
John Josefsen Lerpol, Porsangen  
Per Isaksen, Neiden.  
Josef Persen, Kolvik.  
Sardnejotte O. Korsvik.  
Einar Persen Storfjord,

## Loga dam!

A. Larsen samegiel muittalus girje „Bæivve-Alggo“ læ dal olgusboatam. Dam girjest læ 80 bæle ja maksa kr. 1,10, porto 5 øra.

Girje satta dingujuvvut mu bokte.

A. Larsen,  
Repparfjord, Finnmarken.

„Nuorttanaste“ čalle, prenttežegje ja olgus adde læ Ole Andersen, Skjoldhavn.